

Adalbert Decurtins-Gieriet, Bugnei



Nunspetgadamein ha el bandunau ils ses, vischins e vischinas, ils 29 da november 1996 ella vegliadetgna da 71 onn. Igl Adalbert ei naschius ils 12 d'october 1925 a Bugnei. El eis staus il siatavel e giuven affon dalla famiglia da Sep Antoni Decurtins e Brida Cathomen. Ton sco sia entira veta, cun exepziun dil survetsch militar, ha el passentau ella biala e sulegliva ucliva da Bugnei. Leu fa el il pur cun tgierp ed olma e quei aschiditg sco sias forzas han lubiu.

Igl onn 1954 marida el Antonia Gieriet da Rueras. La lètg vegn benedida cun tschun affons, quater buobs ed ina buoba. Quels portan bia sulegl e legria, mo era lavour e quitau.

Sias forzas ha el era mess a disposiziun al cuminesser e quei oravontut al vischinadi da Bugnei. Sia veta ora ha el quasi fatg cauvitg digl uclaun e varga trenta onns ella suprastanza dalla corporaziun d'aua ed era ella suprastanza dalla assicuranza da biestga.

Siu pli grond plascher fuva il cant e la musica. Aschia suna el 28 onns ella Societat da musica Sedrun e conta varga 25 onns ellas retschas dil Chor da baselgia Sedrun. Omisduas uniuns han honorua siu engaschi cun numnar el commember d'honur.

Igl Adalbert, ni Betti, sco el vegneva pil pli numnaus, fuva in carstgaun da bien cor cun in saun e malign humor. Entuorn el stev'ins tgunsch, capeva el gie oreifer da tener si da frestg la glieud. Era sco enconuschent teatrist en tocs humoristics ei igl Adalbert vegnius appreziatus. Buca meins che trenta onns ha igl Adalbert surviu alla caplutta da s. Giusep sco engaschau ugau e versau caluster. Quei veva el gia giu empriu da siu bab sco caluster pign a s. Vigeli. Il dus da december han vischinas e vischins accumpaignau igl Adalbert sin siu davos viadi o el santeri da s. Vigeli. Il Segner detti ad el la pasch meritada.